

Pol da Kolosi Amin do Papia Mandagit

But piso gen

Kolosi unun kokup pap kinda Esia Provinskon tosook. Unun Epesas kokup pap da kapmatjok tosook. Pol da iyi unun panmuwukbi dima panalon agit, amin di da panalon awit.

Pol unun amin di da Kolosi amin dakon nandan gadatni panupbal ak do an unun dakon geni nandagit. Do nandan gadatni panteban ak do papia on mandagit. Yan yoyisak, Kristo unun yo morap dakon busunji. (Gagi 1.15-20 ae 2.9-15 unudon koki.) Kristo kalon dagin nin yokwikon ban tagi timitjak, ae kosit njwaknjari kindakon da nin aripmi dima panpulugogi. Unun Kristo da dubagikon panjikdan. Kristo obakon da Pinjkop da yo morap wasagit, ae Kristo da pi agit do anek Pinjkop da yo morap yokwikon ban timitdisak. Kristo ninon egakwan nin minjat aminyo kalugi daganek Kristo dakon anpak yolek aman.

Pol da papia on mandan amin bamot do yoban papia anan Kolosi kigimal. Unun Tikikus gat ae Onesimus gat. (Gagi 4.7,9 unudon koki.) Pol da Pilimon do papia mandagit unjungwan Onesimus do morapmi yosok.

Kristo unun yo morap dakon busunji. Ae Pinjkop dakon egip egip ae anpak morap kisi unudon tuganji da tonj

(Kilapmi 1.1–3.4)

¹ Nak Pol, Yesu Kristo dakon yabekbi kinda. Piŋkop da iyi da galak togon yabekbi pi aben do nak manjigit. Nak gat ae notnin Timoti gat nit da ² Piŋkop dakon telagi miŋat aminyo kokup pap Kolosi ekwan ji do papia on mandamak. Ji Kristo yol kimagek nit dakon padik padik ae saminit kabi ekwan. Nin Piŋkop Datnin da nandan yawok daminek butji panyawot aban yaworisi tosak do bisit aman.

Kolosi amin da Yesu nandan gadan imin kimagek

³ Nit ji do bisit amak bisap morapmon Piŋkop, Amin Taginin Yesu Kristo dakon Datni, ya yan iyamak. ⁴ Nido, nit da ji dakon gen nandagimak, unun yan: ji Yesu Kristo nandan gadan imin kimagek Piŋkop dakon miŋat aminyo but dasi galak tan yoman. ⁵ Ji yan an nido Piŋkop da ji do yo tagisi Kwen Kokupmon panoman agit da ton unun timidaman yansi nandan, do nandan gadat anek amin do but dasi galak tan yoman. Gen Bin Tagisi dakon gen bami nandawit bisapmon yo Kwen Kokupmon ton yan ji kili nandawit. ⁶ On Gen Bin Tagisi jikon obinek miktimi miktimi kisi kigit. Yan anek madepsi paptan iren tanek miŋat amin morapmon anpak tagisi panalon an yomisak. Ae Gen Bin Tagisi si abidawit gildaron da wasanek yan gin agit. Unun gildaron Piŋkop da asi amin do nandan yawot an yomisak unun nandaba pisagit. ⁷ Asi Epapras da Gen Bin Tagisi on dayin dekgit. Epapras unun Kristo dakon oman amin

tagisi kında, ae unun nin dakon pi isalnin, nin but dasi galak tan imaman. Unun da nit panpuluganek Kristo dakon pi jikon tosok unun kilani tagisi asak. ⁸ Unun da Telagi Wup da ji panthagap aban amin do but dasi galak tan yoman unun do niyigit.

Pinkop da Kolosi amin panteban asak do Pol da bisit agit

⁹ Yan do, nit ji dakon gen nandagiman bisapmon unun gildaron gin wasanek Pinkop da ji panpulugosak do bisit yipman deri mini amak. Bisit amak unun Telagi Wup da nandak nandak kilegi gat ae nandan kokwin mibili mibili tagi gat daminjakwan ni anpak ani do Pinkop iy nandisak unun nandaba pisosak. ¹⁰ Ji da Amin Tagi dakon minat aminyo da anpak ani do nandisak unun ani do bisit amak. Ae pi tagisi morap ani unun bami tagisi tokdan. Anek Pinkop do morapmi sigin pakyan si nandaba pisokdan. ¹¹ Ae bisit yan yo kisi amak: Ji Pinkop da tapmim mibili mibili damjak, anjakwan unun dakon tapmimni tagisikon ji tebai agek but yaworon da jigi tagi guramitni. Ae kisik kisik ¹² anek Pinkop Dat ya yan iyini. Unun da ji panpuluganban yo ji do Kwen Kokup manjikbi da ton unun kisin da timik timik akdaman. Asi Pinkop dakon minat aminyo nin Pinkop da tentenikon ekwaman unun yo abidokdaman. ¹³ Pinkop da nin pilin tuk da kisiron ban pulugan nipmanek monji Yesu unun but dasi galak tan imisak unun da kila asak da kagagwan nipgut. ¹⁴ Pinkop dakon Monji

1:9: Ep 1.16-17 **1:11:** Ep 1.19; 3.16 **1:12:** Ep 1.11,18 **1:13:** Lk 22.53; Ep 2.2 **1:14:** Ep 1.7

da nin yumanj nanj nipmanjek diwarinin wiririk ningut.

Kristo unjun Pinjkop da yo morap wasagit dakon busunji egisak

¹⁵ Kristo amin da kawit, unjun Pinjkop, dabil da aripmi dima kokogi unjun dakon wupmisi. Kristo unjun Pinjkop da yo morap wasagit dakon busunji egisak. ¹⁶ Kristo da iyi yo morap wasagit. Miktimon yo pindakgamanj unjun gat ae Kwen Kokup yo dima pindakgamanj unjun gat kisi wasagit. Ae kila amin madep gat ae anjelo madep gat ae wup tapmimi tonj gat ae yo kila ani do yandagok anyobi mibili mibili gat kisi wasagit. Asi, Pinjkop da yo morap Yesu da kisiron da wasagit, ae yo morap unjun iyi dakon.

¹⁷ Yo morap dima noman tanakwa Kristo kili egipgut. Ae yo morap iyi da kisiron da kila anjakwan kosirikon tonj. ¹⁸ Kristo unjun panjmuwukbi minjat aminyo dakon busunji egakwan panjmuwukbi unjun giptimni. Iyi panjmuwukbi dakon egip egip dakon mibili. Unjun amin kili kimakgwit da binapmon da mibiltanj pidagit do iyi yo morap dakon busunji aripmi tagi egipjak. ¹⁹ Nido, Pinjkop da iyi dakon egip egip morap kisi ae tapmim morapni kisi Monji unjudon tosak do tagisi nandagit. ²⁰ Pinjkop da miktim gat ae Kwen Kokup gat dakon yo morap kisi unjun gat but kalonj ani do nandagit. Kristo dakon yawi tilak kindapmon tagalgit unjun kosiron da but kalonj noman tosak do nandagit.

21 Ji kalip Piŋkop da dubagikon egek uwalsi an imgwit. Nido, nandak nandakji da uwal an iminek ji anpak yokwisi awit. 22 Mani, Kristo unun tilak kindapmon kili kimakgit, yan aban Piŋkop da ji panpuluganban iyi gat but kalon awit. Unun iyikon panap do anek yan agit. Ae iyi da dabilon gulusunni mini telagi ae gwaljigi mini egipni do yan agit. 23 Ji nandan gadatji tebaisi abidanek tebai atni kan, yan gin noman tan damdan. Ji yum pindagakwa yo kinda da nandak nandakji ilikba, Gen Bin Tagisi nandanek nandan gadat tebaisi anek jomjom agak dakon anpak abidawit unun di yipman dekbam. Nak Pol, Gen Bin Tagisi unun yan tenjenok aben dakon oman amin dagoko minat aminyo morap mibili mibili miktimon ekwan unun yan tenjenok an yomguman.

Pol da Kolosi amin panpulugagit

24 Abisok nak ji panpulugok do giptimnokon tepmi pak do tagisi nandisat. Nak panmuwukbi panpulugok do nandisat, unun Kristo dakon giptimni. Kristo panmuwukbi panpulugok do tepmi pagit unun aban dima dagagit. Giptimnokon tepmi pasat unun Kristo da tepmi pagit unun aripmi ak do nandak nandak asat. 25 Nak panmuwukbi morap ji dakon oman amin daganek egisat, nido Piŋkop da iyi nak ji Israel amin kabikon nani dima unudon gen morapni yan tenjenoken do nak manjigit. 26 Kalipsigwan bisapmi bisapmi Piŋkop da minat amin morap kabi kisikon gen on si ankisibigit. Mani abisok Piŋkop da gen unun analon aban

iyi dakon miñat aminyo nin da kili nandaman. ²⁷ Asi, Piñkop da miñat amin kabini nin noliñban yañsi nandaman, gen pasili uñun wagil tagisisi, ae uñun da Israel amin kabi gat ae Amin Nwakñwari Kabikon nani nin kisi tagisi pañpulugosak yañsi nandaman. Gen pasili uñun yañ: Kristo uñun ji gat egisak. Ae uñun da ji timik pañgwan uñun gat Kwen Kokup egipni do ji uñun do jomjom añek ekwan.

²⁸ Yabekbi nin Kristo dakon Gen Bin Tagisi miñat amin morap kabi kisikon yañ tenñoman. Nin nandak nandak tagisisi uñun bañ miñat amin morap yoyiñ dekgaman, ae Piñkop dakon gen morap pakyañsi kañ kimagek yolni do yoyaman. Nido nin Yesu yolyol amin tebaisi daganba Piñkopmon pañkineñ do nandaman. ²⁹ Yañsi no-man toni do nandañek nak tapmim morapno tañ namñakwa pi tebaisi asat. Kristo da iyi uñun tapmim pañalon namñakwan pi uñun asat.

2

Nandan gadat tebai añek top gen pabiñ yopneñ

¹ Nak Pol da on nandani do nandisat: Nak ji gat ae Laodisia miñat aminyo gat ae miñat amin morap diwari gat kisi da nak dakon iñam dima kawit amin nak ji kisi pañpulugok do pi madepsi asat. ² Pi madepsi asat, nido ji dakon but pañteban abo tebai tosak do nandisat, añek but dasi galak tañ yomyom añpak tagisi tañakwan kabi kalonji ani. Pi madepsi añapbo uñun da ji dakon nandan gadat pañteban añakwan Piñkop dakon gen pasili uñun dakon mibili tagi nandaba pìsosak. Kristo uñun

gen pasili unun dakon mibili. ³ Nandan kokwin tagisi morap gat ae nandak nandak tagisi morap gat unun yo tagisi yuman nogi wukwisi yombem da Kristokon pasili ton.

⁴ Nak gen on yosot, nido amin di da top dayinek pangalak ani yan do dima galak tosot. ⁵ Asi, nak ji gat kisi dima ekwaman, mani nandak nandaknokon da ji gat egisat. Ji da but kalon anek Kristo tebai nandan gadan iman, unun do anek but galaksi nandisat.

⁶ Ji Yesu Kristokon gadanek yipba Amin Tagisi egipgut, do unun da anpagon sigin egipni. ⁷ Ji kindap geli yopba pigakwa miktimon tebai akgan, ae yut da gwak tebai da kwenon tebai akgan unun da aripmon tebai atni. Anek Gen Bin Tagisi amin da dayin dekgwit unun tebaisi nandan gadan kimotni. Anek bisapmi bisapmi Pin kop ya yan iyin kimotni.

⁸ Ji kan kimotni. Amin kinda da top gen kinda dayinban nandak nandakni di yolbam. Unuden amin babakni gat ae wup yokwi kundu ae miktimyoo kila an dakon nandak nandak ban timikgan. Unun Kristo dakon nandak nandak dima yolgan. ⁹ Ji disisi nandan, Kristo amin nin yombem daganek Pin kop dakon egip egipni tungan imgut. ¹⁰ Ae Kristo kalonon gin egip egip bamijikon tugagit. Unun kila amin mibili mibili miktimon ae kwen binap ekwan kisi dakon Amin Tagini egisak.

¹¹ Ji Kristo gat gadawit anek Kristo da pi agit do anek but kalip kili yopman mudawit. But kalip

yopyop dakon anpak unun giptim mandak dakon anpak yombem, mani unun giptim dakon dima. Kristo da yo unun butjikon agit. ¹² Ji telagi pakbi sowit bisapmon, Pin kop da ji gat ae Kristo gat kisi kimakbi tamogwan wayikgit. Ae Pin kop Kristo kimoron nan aban pidagit unun dakon tapmim madepni do nandan gadan, do telagi pakbi sowit unun kimoron ban paban pidawit yan asak.

¹³ Kalip ji yokwi mibili mibili awit, anek but kalip dakon anpak yolba unun da dikban kimakgwit. Mani abisok Pin kop da panpuluganban Kristo gat kisi egip egip ekwan. Anakwa Pin kop da diwarinin kisisi wiririk ningut. ¹⁴ Nin gulusun morapmi agiman, do Pin kop dakon gen teban mandabi da ton unun da gen yan nimek obisi pabin nipgut. Mani, Pin kop da Yesu tilak kindapmon kimakgit bisapmon papia tam unun abidan tilak kindapmon anakgit. Yan anek gen teban mandabi unun kisi morap aban pasilakwan gen wagil kimakgit. ¹⁵ Yan anek kon tapmimi ton dakon busuni morap gat, ae kon tapmimi ton diwari gat dakon tapmim pabin yopgut. Anek Kristo da tilak kindapmon pi agit do anek, Pin kop da pabin yopban minat aminyo da dabilon yo isali awit.

Nin Kristo gat kisi kili kimakgiman, do gen teban morap da nin aripmi dima panpulugogi

¹⁶ Yando, amin kinda da gen yan daminek jap pakbiyo dakon gen teban dima yolgan, bo telagi bisap madep do bilagi bilagi dima yolgan, bo ae kanek kalugi dakon bisap dima yolgan, bo ae

Sabat bisap yo kisi dima yolgan, unun morap do yum pindagakwa amin da gen di yan dabam. ¹⁷ Unun yo bami noman tokdisak dakon wupmigin. Yo bamisi unun Kristo. ¹⁸ Yan do anek amin kinda yo dipminon pindakgit unun do dayinek ji anelo gawak yomni do dayinban kan yum kanakwa dima pabin depjak. Unuden amin but kalip dakon anpak yolek iyi do nandak nandak amin yan nandan. ¹⁹ Unun amin Kristo busunin yipmanek unun da kagikon ekwan. Busunin unun da giptimni kisi upmokdok, anek giptim dakon sanbek morap sanbenakwan gadanek tagi ton. Anakwan giptim unun Pinkop da tapmimon tagan madep tosok.

²⁰ Ji Kristo gat kili kimakgwit, yan anek on miktim dakon nandak nandak yokwi kili yipman dekgwit. Do ji nido abisok miktim amin da aripmon akwan? Ji nido on miktim dakon gen teban unuden yolgan? ²¹ “Ji yo dima timitni, ji yo dima noni, kisitgokon yo dima panjutnoki. Ji yan ani kan, Pinkop da dabilon jimjimji ton.” ²² Gen teban unun jap isali amin da don nan mudon unun do yon. Amin dagin gen teban unun yopmanek unun ban dayin dekan. ²³ Asi, amin diwari gen teban unuden yolek nin Pinkop bamisi gawak imaman yan nandan, mani dimasi. Ae iyi do nandaba pinakwa giptimni panupbal anek Pinkop da unun do tagisi nandan nimisak yan nandan. Unun gen teban yolek nandak nandak tagisi ban yolgaman yan nandan, mani dimasi. Unun gen teban morap da nin panpuluganba but kalip dakon anpak aripmi dima pabin yopnen.

3

Nin Kristo gat kisi kimoron da kili pidagiman

¹ Ji Pinƙop da egip egip kalugi damgut anek Kristo gat kisi kimoron ban paban pidawit. Unun do anek ji Kwen Kokup dakon yo timit do nandak nandak ani. Unun kokupmon Kristo unun Pinƙop da amin tet do kila amin madep yityit tamonikon yikdak.

² Ji Kwen Kokup dakon yo dogin nandanek miktim dakon yo do dima nandani. ³ Nido ji amin kili kimakgwit yombem. Ji Pinƙopmon gadanek egip egipji bamisi unun Kristokon pasili tosoƙ. ⁴ Kristo egip egipnin dakon mibili don altaƙ noman tosaƙ bisapmon jiyo kisi unun gat Pinƙop da tenƙenji madepmon altaƙ noman tokdan.

Kristo unun nin da butgwan egek unun da aban nin minat aminyo kalugi dagagiman

(Kilapmi 3.5–4.18)

Nin minat aminyo kalugi agiman

⁵ Yando, ji miktim dakon anpak morap butjikon ton unun dapba kimak mudoni. Nak anpak oden do yosot: yumabi anpak mibili mibili, ae yo yokwi ak do but kindap, ae yo morapmi timit do nandaba kik. Unun yo morapmi timit do nandak nandak unun da ji kokup kidat gawak yomanƙ yan asak. ⁶ Pinƙop da minat aminyo anpak unuden anek geni dima guramikgan unun tomni yokwisi yomdisak. ⁷ Jiyo kisi kalip Pinƙop dakon gen dima guramikgwit bisapmon anpak unuden awit. ⁸ Mani

3:1: Mk 12.36; 16.19; Ep 1.20 **3:2:** Mt 6.33 **3:5:** Ro 6.6,11;
Ep 4.19; 5.3-6 **3:8:** Ep 4.25-29; 5.4

abisok anpak unuden wiririk mudoni. Ji butjap dima nandani, ae amin do nandaba yokwi tok dima ani, ae amin do yanba yokwi tok dima ani, anek gen dima yogogi dima yoni. ⁹ Panmuwukbi notji top gen dima yoyini. Nido, but kalip gat anpakni gat kili yopgwit. ¹⁰ Anek ji kili amin kalugi dagawit. Asi, Pinjop da iyi ji panjaluk anek nandak nandak tagisi daminjakwan amin kalugi daganek iyi yombemsi ekwan. ¹¹ Do egip egip kalugi unudon, ji kisi arip gin. Amin Nwakanwari Kabi bo Juda amin, unun yo isali. Bo ae giptim mandabi bo dima mandabi, unun yo isali. Bo ae dubagikon amin geni nwakanwari yon ae anpakni nwakanwari an unun yo kisi yo isali. Bo ae oman amin bo oman amin dima, unun yo isali. Yo madep unun Kristo nin kisin dakon wukwinin egisak, ae nin kisi morapngwan egisak.

Nin amin do but dasi galak tan yomyom anpak abidan kimotnen

¹² Pinjop da ji kili manjigit da iyi dakon telagi minjat aminyo egakwa but dasi galak tan damisak. Do ji anpak oden ban yolek ani: Ji minjat aminyo kisi morap do bupmisi nandan yominjek yo tagisi anyomni. Ji disi do nandaba pinakwa minjat aminyo anpak yaworisi anyominjek but yaworon da jigi pani. ¹³ Ae jikon amin di gat gen di ton kan, but tobil ani do bikbik yomni. Anek yum pindagek diwarini yopman yomni. Amin Tagi da diwarisi kili yopgut, do jiyo kisi notji dakon diwarini yopman yomni. ¹⁴ Ji amin do but dasi galak tan

3:9: Ep 4.22,25 **3:10:** Ep 4.24 **3:11:** Gal 3.28 **3:12:** 1Pi 2.9
3:13: Ep 4.2,32 **3:14:** Ro 13.8-10

yomni, nido unun anpak da anpak morap yapman mudosok. Ae unun da anpak tagisi morap kisi jonikban pi kalonji anj. ¹⁵ Yum kanakwa Kristo da but yawot damisak unun da nandak nandakji kila asak. Nido, Pin kop da ji iyɪ do manjinjek butji yawori tanakwan giptim kalonji egipni do nandisak. Ae ji yo morap do Pin kop ya yan iyini. ¹⁶ Kristo dakon gen yipba butjikon tebai tosak. Ji kalon kalon notji yoyindet aba nandak nandak kilegi timigek anpak tagisi banjin ani. Butjikon da Pin kop ya yan iyini, ae Kap papiakon kap yoni, ae Pin kop gawak imim dakon kap yoni, ae Telagi Wup da kap panalon anj damisak unun yo kisi yoni. ¹⁷ Ae gen morap yoni, ae pi morap anikon nin Amin Tagi Yesu dakon minjat aminyo yan nandanek ani. Anjek Yesu da manon yo morap do Pin kop ya yan iyini.

Pol da Yesu yolyol amin yuri kindan nianj egipni do yagit

¹⁸ Minjat ji esi dakon gen nandanek guramitni. Nido, ji Amin Tagi dakon, ae anpak unun Pin kop da dabilon kilegisi. ¹⁹ Ae wili ji minjatji but dasi galak tan yominj kimotni, anjek buri si yokwi toni da aripmon anpak yokwi dima anjomni.

²⁰ Ae minjat monjiyo, ji menj datji dakon gen nandanek yo morapmon geni guramitni. Amin Tagi da unuden anpak yolni do galak tosak. ²¹ Ae dat, ji monji gwayosi tebaisi yoyinba ji do nandaba yokwi tok di anj dabam. Yanj aba yo tagi di nin da aripmi dima anen yan di nandabam.

3:15: 1Ko 12.27; Ep 4.4; Pil 4.7 **3:16:** Ep 5.19 **3:17:** 1Ko 10.31; Ep 5.20 **3:18:** Ep 5.22 **3:19:** Ep 5.25 **3:20:** Ep 6.1
3:21: Ep 6.4

Pol oman amin gat kila amin gat do yagit

²² Oman monji, ji kila aminji dakon gen morap guramik kimotni. Nindaba tagisi asak yan do anek kapmat egek dandisak bisapmon pi tagisi di abam. Dima. Ji Amin Tagi do pasal iminek pi ani unun but dasi nandanek ani. ²³ Yo morap ani unun si teban taneke ani. Amin dogin dima, Amin Tagi do pi aman yan nandanek ani. ²⁴ Disi nandan, don Amin Tagi da tomni damdisak. Tomni unun yo tagisi minjat amini do manjigit unun. Ji Kristo dakon pi monji ekwan, ae unun kila aminji egisak. ²⁵ Amin morap gulusun an, unun gulusunni dakon tomni timitdan. Pin kop da minjat amin morap dakon anpak kokwin ak do arip gin asak.

4

¹ Kila amin, ji oman monjisi anpak tagisi ae kilegisi ban anyomni. Disi nandan, jiyu kisi oman monji egakwa Kila Aminji Kwen Kokup egisak.

Bisit tebai anek anpak kilegi anen

² Bisit agak unun tebaisi abidan kimotni. Anek bisit ani bisapmon si nandan kimagek Pin kop ya yan iyini. ³ Pin kop da ninyo kisi panpulugosak do bisit ani. Bisit iyinba Kristo dakon gen kalip pasili tagit unun yan tetenonen do Pin kop da kosit yipman nimjak. Nin geni antenten ano minjat aminyo da dima galak taneke dam tebanon nepgwit. ⁴ Bisit aba geni unun nomansi yan tetenjoken. Pin kop da yan si abendosi nandisak.

⁵ Ji paŋmuwukbi dima abi miŋat amiŋyo gat egipni biŋapmon nandak nandak tagiŋi baŋ yolek aŋpak kilegi aŋ kimotni. Biŋapmi biŋapmi Kristo da miŋtimon aŋpak agit, uŋudenŋ ak do tagap toni. ⁶ Biŋapmi biŋapmi gen tagiŋi miŋat amiŋyo paŋpulgogi uŋun baŋŋin yoni. Do gen di miŋbili nandak do dayini biŋapmon geni kobogi gen tagiŋi baŋ yoyini.

Pol da Tikikus gat Onesimus gat yabekban Kolosi kiŋimal

⁷ Tikikus da nak da egip egip morap asat uŋun dayikdisak. Tikikus uŋun notninsi, ae pi isalnin, ae Amin Tagi dakon oman amiŋi tagiŋi. ⁸ Nin niaŋ ekwamaŋ dakon geni dayiŋban nandani, ae ji dakon but paŋteban asak, miŋbili yaŋ do aŋek jikon yabekgo kiŋit. ⁹ Nak Onesimus yabekgo Tikikus gat kiŋimal. Onesimus uŋun notnin tagiŋi. Uŋun pi do but dasi nandaŋek aŋ kimokdok. Uŋun ji da kabikon amin kindi. Uŋun bamot da yo morap idon noman tawit uŋun do dayikdamal.

Pol da gildatni tagi Kolosi amin do yipban kiŋit

¹⁰ Aristakus, uŋun nak gat kiŋi dam tebanon ekwamak. Uŋun da gildat tagi yaŋ dayisak. Ae Mak, Banabas dakon nugi, uŋunyo kiŋi gildatni tagi yaŋ dayisak. (Nak Mak do gen kili yipbo nandawit. Gen uŋun yaŋ: jikon apban kaŋ, but galagon da abidoni.) ¹¹ Ae amin kindi Yesu, amin da Jastus yaŋ iyaŋ, uŋunyo kiŋi gildat tagi yaŋ dayisak. Israel amin kabikon uŋun amin kabi dagin nak gat pi

4:5: Ep 5.15-16 **4:6:** Ep 4.29; 1Pi 3.15 **4:7:** Ep 6.21 **4:8:** Ep 6.22 **4:9:** Plm 10-12 **4:10:** Ya 12.12; 13.13; 15.37-39; 2Ti 4.11

añek Pinjkop dakon amin kila agakni teban tosak do pi aman. Unun amin da butno tagisi anjeban anj.

¹² Epapras da gildat tagi yan dayisak. Unun ji da kabikon amin kindi, ae Yesu Kristo dakon oman amin. Ji da Pinjkop dakon galaktok morap nandaba pisanjek tebai atni do bisapmi bisapmi bisit tebai asak. ¹³ Yanji dayisat, unun da ji gat ae panmuwukbi morap kokup pap Laodisia ekwan gat ae Irapolis kokup papmon ekwan unun panpulugok do pi madepsi asak.

¹⁴ Luk, wuda wamaknin unun but dasi galak tan imaman, unun gat ae Demas gat da gildat tagi yan dayamal.

¹⁵ Laodisia kokup papmon panmuwukbi ekwan unun gildatno tagi yoyini. Ae Nimpa gat ae panmuwukbi morap unun minjat da yutnon muwukan ununyo kisi gildatno tagi yoyini. ¹⁶ Ji papia on manjinek Laodisia panmuwukbi do yipba kwan ununyo kisi da manjini. Ae papia Laodisia do yipbo kigit, ununyo kisi ji da tagi manjini. ¹⁷ Anek Akipus yan iyini, “Gak Amin Tagikon pi abidagil unun kilani tagisi anek pi unun tagisi abi.” ¹⁸ Nak Pol da naga gildat tagi on mandisat. Dam tebanon sigin egisat, do dima intan namni. Pinjkop dakon nandan yawotni jikon tosak.

PIN^KOP GEN
The New Testament and Psalms in the Yopno Language
of Papua New Guinea
Nupela Testamen na Buk Song long tokples Yopno long
Niugini

copyright © 2010 Wycliffe Bible Translators, Inc.

Language: Yopno

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-01-09

PDF generated using Haiola and XeLaTeX on 11 Nov 2022 from source files dated 9 Oct 2020

b683ce50-d820-5bfc-8471-d8ee080be106